



Adresa: **Ul. Hamdije Čemerlića 39a**  
71000 Sarajevo  
<http://www.voda.ba>

tel. +387 33 726 400  
fax. +387 33 726 423  
e – mail: [info@voda.ba](mailto:info@voda.ba)

Broj: **UP-1/21-3-40-196-4/25**

Datum: **13.10.2025. godine**

«Agencija za vodno područje rijeke Save» Sarajevo rješavajući po zahtjevu pravnog lica, «ALMY» d.o.o. Zenica za donošenje rješenja o vodnoj dozvoli za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokacije kompleksa objekata Betonare kapaciteta 60 m<sup>3</sup>/h u naselju Lipice-Vranduk, grad Zenica, na osnovu člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

## R J E Š E N J E

Odbija se zahtjev pravnog lica, «ALMY» d.o.o. Zenica za donošenje rješenja o vodnoj dozvoli za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta kompleksa objekata Betonare kapaciteta 60 m<sup>3</sup>/h izgrađenog u naselju Lipice-Vranduk na zemljištu označenom kao k.č. broj: 3496/3 i 3489/1 K.O. Vranduk, grad Zenica kao neosnovan jer je dio predmetnog kompleksa objekata izgrađen unutar granice vodnog dobra uz rijeku Bosnu što je u suprotnosti sa odredbama člana 12. Zakona o vodama («Službene novine Federacije BiH», broj: 70/06).

## O b r a z l o ž e n j e

Pravno lice «ALMY» d.o.o. Zenica, dana 13.06.2025. godine, podnijelo je ovoj Agenciji zahtjev za izdavanje vodne dozvole za aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda sa lokaliteta Betonare kapaciteta 60 m<sup>3</sup>/h izgrađene u naselju Lipice-Vranduk, na zemljištu označenom kao k.č. broj: 3496/3 i 3489/1 K.O. Vranduk, grad Zenica.

U provedenom postupku dostavljena je i pregledana sljedeća dokumentacija:

- Ovjerena kopija Aktuelnog izvoda iz sudskog registra broj: 043-0-RegZ-25-000655 izdatog dana 04.03.2025. godine od strane Općinskog suda u Zenici,
- Ovjerena kopija Uvjerenja o poreznoj registraciji izdatog dana 12.01.2011. godine od strane Porezne uprave – Kantonalni ured Zenica,
- Ovjerena kopija Uvjerenja o registraciji/upisu u Jedinostveni registar obveznika indirektnih poreza broj: 04/1-UPJR/1-4329-2/09 izdatog dana 22.09.2009. godine od strane Uprave za indirektno-neizravno oporezivanje Banja Luka,
- Ovjerena kopija Rješenja o upotrebi građevine broj: 12-23-3883/05 izdatog dana 12.12.2005. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona,
- Kopija Rješenja o vodnoj dozvoli za ispuštanje sanitarno-fekalnih voda broj: 05-25-1447-1/10 izdatog dana 06.09.2011. godine od strane Ministarstva za poljoprivredu, šumarstvo i vodoprivredu Zeničko-dobojskog kantona,
- Kopija Rješenja o vodnoj dozvoli broj: UP-I/25-3-40-351-4/16 izdatog dana 30.11.2016. godine od strane «Agencije za vodno područje rijeke Save» Sarajevo,
- Kopija Rješenja o odbijanju zahtjeva za izdavanje vodne dozvole broj: UP-I/25-3-40-257-9/18 izdatog dana 23.11.2018. godine od strane «Agencije za vodno područje rijeke Save» Sarajevo,
- Kopija Rješenja o okolinskoj dozvoli broj: 12-23-08549/15 izdatog dana 27.02.2017. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona,

- Kopija Ugovora broj: 478/25 o čišćenju separatora i septičkih jama i odvozu otpadnog mulja i taloga zaključenog dana 10.03.2025. godine između «ALMY» d.o.o. Zenica i «DELTA PETROL» d.o.o. Kakanj,
- Kopija Izvještaja o monitoringu kvaliteta i kvantiteta otpadnih voda pogona za proizvodnju betona br 1. «ALMY» Vranduk-Lipice broj: 242/25 urađen od strane «Inspekt-RGH» d.o.o. Sarajevo, februar 2025. godine,
- Kopija Rješenja o pripadnosti javnom vodnom dobru zemljišne čestice označene kao k.č. broj: 3489/10 K.O. Vranduk, općina Zenica broj: UP-I-07-2-25/1-1312/13 od 30.09.2013. godine izdatog od strane Federalnog Ministarstva poljoprivrede, vodoprivrede i šumarstva Sarajevo,
- Kopija Zapisnika broj: UP1-14-21-2-00007/2025-14-P-14-2-P urađenog dana 06.05.2025. godine od strane Federalne uprave za inspekcijske poslove – Vodni inspektorat,
- Kopija Rješenja broj: UP1-14-21-2-02332/2025-14-4-P izdatog dana 09.05.2025. godine od strane Federalne uprave za inspekcijske poslove – Vodni inspektorat,
- Dokaz o uplaćenju upravnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku i uvjetima i načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), izvršen je obilazak predmetnog kompleksa Betonare kapaciteta 60 m<sup>3</sup>/h u naselju Lipice-Vranduk, grad Zenica i tom prilikom je sačinjen Zapisnik o uviđaju broj: UP-1/21-3-40-196-3/25 od 22.05.2025. godine.

Na osnovu uvida u dostavljenu dokumentaciju i izvršenog uviđaja na licu mjesta utvrđeno je sljedeće:

- Predmetni kompleks objekata izgrađen je na parceli označenoj kao k.č. broj: 3496/3 K.O. Vranduk u naselju Lipice - Vranduk uz regionalni put R445 Zenica-Nemila. Na predmetnom lokalitetu se nalaze sljedeći objekti: postrojenje betonare kapaciteta 60 m<sup>3</sup>/h (tip «Elkon beton santrali elkomix-60»), bunker za agregat kapaciteta 4x30 m<sup>3</sup>, dva silosa za cement kapaciteta 2x75 m<sup>3</sup> i elevator.

U sklopu kompleksa betonare, na lijevoj obali rijeke Bosne a na dijelu parcele k.č. broj: 3489/1 K.O. Vranduk, izgrađeni su dodatni boksovi za smještaj agregata i uređaj za recirkulaciju vode sa taložnim bazenom. Pranje mješalica/miksera za beton vrši se iznad taložnog bazena. Preliv iz taložnog bazena je u rijeku Bosnu. Izgrađeni objekti čine sastavni dio tehnološke cjeline predmetne betonare.

- Uvidom u informacioni sistem voda AVP Sava (ISV), Rješenje o određivanju granice vodnog dobra uz rijeku Bosnu na području Općine Zenica broj: UP-I-07-25/1-1645/13 od 26.11.2013. godine i Rješenje o pripadnosti javnom vodnom dobru zemljišne čestice označene kao k.č. broj: 3489/10 K.O. Vranduk, općina Zenica broj: UP-I-07-2-25/1-1312/13 od 30.09.2013. godine izdatih od strane Federalnog Ministarstva poljoprivrede, vodoprivrede i šumarstva Sarajevo, utvrđeno je da se zemljišna čestica označena kao k.č. broj: 3489/1 K.O. Vranduk na kojoj su izgrađeni boksovi za smještaj agregata, nalazi u potpunosti unutar granica vodnog dobra iz čega proizilazi da na toj zemljišnoj čestici važe izričite zabrane bilo kakvih aktivnosti osim onih koje su navedene u članu 12. stav (1) Zakona o vodama («Službene novine Federacije BiH», broj 70/06) a izgradnja boksova za smještaj agregata i deponovanje bilo kakvog materijala ne spada u takve aktivnosti.
- Prema članu 95. Zakona o vodama, na vodnom dobru i priobalnom zemljištu zabranjene su djelatnosti i zahvati koji mogu ugroziti stabilnost vodnog i priobalnog zemljišta; umanjiti stepen zaštite od štetnog djelovanja voda; spriječiti normalan protok vode, naplavina i mulja.
- Za predmetni kompleks betonare je od strane Agencije u ranijem postupku izdato Rješenje o vodnoj dozvoli broj: UP-I/25-3-40-225-6/11 od 15.06.2011. godine i Rješenje broj: UP-I/25-3-40-351-4/16 od 30.11.2016. godine. Prema uslovu datom u tački 3.2. izdatih Rješenja, vlasnik odnosno korisnik objekta betonare je bio obavezan izvršiti potpuno uklanjanje boksova za smještaj agregata i uređaja za recirkulaciju vode sa taložnim bazenom koji su izgrađeni na dijelu čestice k.č. broj: 3489/1 K.O. Vranduk označene kao javno vodno dobro te da se nakon uklanjanja spornih objekata, lijeva obala rijeke Bosne vrati u prirodno stanje.

- Nakon izdavanja gore pomenutih Rješenja o vodnoj dozvoli, pravnom licu «ALMY» d.o.o. Zenica je nakon podnošenja narednog zahtjeva za izdavanje vodne dozvole doneseno Rješenje o odbijanju zahtjeva broj: UP-I/25-3-40-257-9/18 od 23.11.2018. godine.  
U postupku donošenja ovog Rješenja zatraženo je a potom i dostavljeno Izjašnjenje o svim činjenicama i okolnostima zbog kojih nije postupljeno po uslovu navedenom u tački 3.2. ranije izdatih Rješenja – dopis broj: 1029-18-4/3 od 07.09.2018. godine dostavljen od strane «ALMY» d.o.o. Zenica sa pojašnjenjem da boksovi nisu uklonjeni jer su od velikog značaja za poslovanje betonare.
- U toku uviđaja na uvid je dostavljen Zapisnik o inspekcijskom nadzoru broj: UP1-14-21-2-00007/2025-14-P-14-2-P od 06.05.2025. godine a naknadno je dostavljeno i Rješenje Vodnog inspektora Federalne uprave za inspekcijske poslove broj: UP1-14-21-2-02332/2025-14-4-P od 09.05.2025. godine prema kojem se pravnom licu «ALMY» d.o.o. Zenica daje rok od 60 dana, od dana prijema rješenja, da podnese zahtjev za izdavanje nove vodne dozvole, dostavi traženu dokumentaciju i ustraje u ispunjavanju ostalih uslova koji su neophodni za izdavanje iste.

U toku uviđaja izvršenom dana 22.05.2025. godine konstatovano je da se poduzimaju određene aktivnosti na uklanjanju/premještanju boksova za agregat te je u Zapisniku o uviđaju evidentirana izjava direktora Sektora za proizvodnju «ALMY» d.o.o. Zenica da će sporni objekti biti uklonjeni za max 2 mjeseca od dana uviđaja.

Nakon isteka 60 dana od dana prvog uviđaja, naknadnim uviđajem izvršenim dana 15.08.2025. godine utvrđeno je da su na dijelu parcele označene kao k.č. broj: 3489/1 K.O. Vranduk (vodno dobro) uklonjeni pregradni zidovi boksova za agregat, uklonjen je deponovani materijal ali nije uklonjen stražnji zid boksova. Takođe, nije uklonjen uređaj za recirkulaciju vode sa taložnim bazenom koji se i dalje koristi u tehnološkom postupku spravljanja betona za pranje mješalica/miksera za beton. Na ispustu iz taložnog bazena evidentirana je značajna devastacija lijeve obale rijeke Bosne.

Razmatrajući podneseni zahtjev, a na osnovu uvida u dostavljenu dokumentaciju i uviđaja izvršenog na predmetnom lokalitetu dana 22.05.2025. godine a potom i 15.08.2025. godine, konstatuje se da podnosilac zahtjeva nije ispunio uslove za izdavanje vodne dozvole.

Na osnovu prednjeg i provedenog postupka konstatovano je da sa aspekta sektora voda postoje ograničenja koja proizilaze iz odredbi Zakona o vodama da se podnosiocu zahtjeva izda tražena vodna dozvola, pa je riješeno kao u dispozitivu ovog Rješenja.

Podnosilac zahtjeva uplatio je posebne troškove prema Zaključku ove Agencije broj: UP-1/21-3-40-163-2/25 od 20.05.2025. godine.

Podnosilac zahtjeva je uplatio upravnu taksu u iznosu od 70 KM U skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10, 43/13 i 98/17).

#### **Uputa o pravnom lijeku:**

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obrađivač akta: Nermina Hodžić, dipl.inž.građ.

Po ovlaštenju  
Rukovodilac Sektora za izdavanje vodnih akata



Nihad Pezo, dipl.inž.građ.

Dostaviti:

- «ALMY» d.o.o. Zenica  
ul Vrandučka bb, 72000 Zenica
- Ⓞ AVP, ISV – Vodna knjiga
- Sektor 40, arhiva
- Oglasna ploča – AVP Sava